

LORENZO REXEITA AS ACUSACIÓNS DO EDITOR E REITERA O SEU APOIO AO GALARDÓN

Escritores e editores “lamentan” que Pillado deixe o premio Repsol

As asociacións seguirán a enviar representantes para o xurado do certame de narrativa curta

H. PENA

GALICIA

cultura@xornaldeg Galicia.com

A Asociación Galega de Editores (AGE) e a Asociación de Escritores en Lingua Galega (AELG) declaran o seu “respecto” polo labor de Francisco Pillado como coordinador do Premio Narrativa Breve que convoca a Fundación Repsol e “lamentan” que se prescinda da súa figura. O director da editorial Laiovento denunciou onte en Xornal que xa non ocupaba o cargo de coordinador do certame convocado pola petrolera polos seus “desencontros” con Anxo Lorenzo, secretario xeral de Política Lingüística.

O propio Lorenzo afirmou en declaracións a este diario que “en ningún momento” lle fixo nada a Francisco Pillado, e apuntou que a Xunta de Galicia seguirá a dar apoio institucional a un premio no que “quen manda realmente é Repsol”. A Real

Academia Galega, a Asociación de Escritores en Lingua Galega e a Asociación Galega de Editores integran o xurado dun certame dotado con 9.000 euros e que este ano celebrará a súa quinta edición.

Manuel Bragado, presidente da asociación de editores, expresou a súa “solidariedade” cara a un profesional como Pillado, a quen “admira”. Con respecto á continuidade do colectivo que encabeza no certame literario, apuntou que “a asociación aínda ten que valoralo pero, en principio, non hai ningún problema con seguir”.

UN CERTAME “IMPORTANTE”

Nunha liña similar á de Bragado expresouse Cesáreo Sánchez, presidente da Asociación de Escritores en Lingua Galega. “Dende a AELG lamentamos que se prescinda dun home como Francisco Pillado, un home que axudou a que o Premio Narrativa Breve de Repsol teña o prestixio que ten hoxe”.

Cesáreo Sánchez tamén engadiu que “sinte” que Pillado non vaia estar máis á fronte do certame “por todo o que pode achegar ao premio”. Asemade, o presidente da AELG confirmou que a súa asociación está de

novo convidada a enviar un representante para que forme parte do xurado do galardón literario.

Tras falar co Consello Directivo da Asociación de Escritores en Lingua Galega, Cesáreo Sánchez dixo a Xornal que mentres o Premio Repsol “defenda os valores” que eles pensan que debe asumir, seguirán a enviar un representante ao xurado.

O secretario xeral asegura que “en ningún momento” lle fixo nada a Pillado

“O Consello Directivo pensa que neste momento que está a atravesar a cultura galega é importante apoiar premios como o de narrativa Repsol, xa que axudan a visibilizar a nosa cultura”, indicou Sánchez, que concluiu engadindo que a AELG defende a existencia do “máximo respecto” entre as institucións. ■

www.xornal.com

Opina sobre o ‘affaire’ entre Anxo Lorenzo e Francisco Pillado na nosa web



O secretario xeral de Política Lingüística, Anxo Lorenzo

OLALLA LOJO